

RMKe-12: Kerajaan bantu pacu semula sektor industri penerbangan, aeroangkasa

Oleh Farah Marshita Abdul Patah - September 8, 2022 @ 3:38pm
farahmarshita@bh.com.my



(Dari atas) Raja Muda Selangor, Tengku Amir Shah, Menteri Besar Selangor, Datuk Seri Amirudin Shari, Menteri Kewangan, Tengku Datuk Seri Zafrul Tengku Aziz, Exco Industri dan Perdagangan Selangor, Datuk Teng Chang Khim melawat pameran kapal terbang pada perasmian Selangor Aviation Show 2022 di Skypark Regional Aviation Centre, Bukit Jelutong Shah Alam. - Foto FAIZ ANUAR

SHAH ALAM: Kerajaan akan membantu industri penerbangan dan aeroangkasa dengan melabur dalam sektor itu bagi memacu pertumbuhan ekonomi negara di bawah Rancangan Malaysia Ke-12.

Menteri Kewangan, Tengku Datuk Seri Zafrul Tengku Abdul Aziz, berkata sebelum kerajaan membuka semula sektor ekonomi, adalah penting untuk kerajaan Persekutuan merangsang pertumbuhan ekonomi melalui pelaburan dalam sektor strategik termasuk industri aeroangkasa dan penerbangan.

Katanya, kerajaan dan pihak kementerian juga menyedari cabaran yang dihadapi oleh industri penerbangan, terutamanya untuk mengekal dan mengembangkan perniagaan.

"Malah birokrasi berpanjangan mungkin menghalang pelabur asing dan domestik untuk menjalankan perniagaan di Malaysia.

"Yakinlah bahawa kami sedang berusaha untuk menyelesaikan isu-isu ini," katanya ketika berucap merasmikan Pameran Penerbangan Selangor (SAS) 2022 di Pusat Penerbangan Serantau, Subang SkyPark, di sini, hari ini.

SAS 2022 yang dianjurkan oleh kerajaan Selangor dan Invest Selangor buat kali kedua, dirasmikan oleh Raja Muda Selangor, Tengku Amir Shah Sultan Sharafuddin Idris Shah.

Turut hadir Menteri Besar Selangor, Datuk Seri Amirudin Shari, dan Pengurus Jawatankuasa Pelaburan dan Industri Selangor, Datuk Teng Chang Khim.

Tengku Zafrul berkata, pertumbuhan ekonomi Malaysia dijangka mendapat sokongan daripada aktiviti sosial dan ekonomi yang teguh serta permintaan domestik dan asing yang kukuh berikutan peralihan negara ke fasa endemik COVID-19 dan pembukaan semula sempadan antarabangsa.

Katanya, momentum pertumbuhan ekonomi dijangka kekal kukuh pada suku ketiga 2022, dipacu oleh kemajuan yang memberangsangkan dalam pelancongan dan perdagangan luaran.

"Malah, baru-baru ini kita melihat hasilnya di mana ekonomi berkembang sebanyak 8.9 peratus pada suku kedua tahun ini.

"Ia mengatasi beberapa negara maju dan serantau, malah, pemulihannya positif itu sudah terbukti sejak suku keempat 2021," katanya.

Zafrol juga yakin inisiatif seperti penganjuran SAS akan menjadi jambatan untuk menghubungkan ASEAN dan peserta industri global serta menarik minat mereka untuk menjalankan perniagaan di Malaysia khususnya dalam bidang perniagaan penerbangan, penerbangan am, helikopter, dron dan penerbangan sukan.

"Saya difahamkan, kerajaan Selangor menerusi Invest Selangor, bekerjasama rapat dengan pemain industri aeroangkasa bagi mengenal pasti bidang kerjasama dan peluang untuk memastikan pertumbuhan yang mampan dalam industri aeroangkasa dan penerbangan negara.

"Saya menantikan hasil positifnya tidak lama lagi," katanya.